

- विधानसभा मांय लारला दिनां ऊं चाल रही रार खत्म व्ही-आला नेतावां बीचे चर्चा पाछे कांग्रेस रा विधायक सदन री कार्यवाही मांय शामिल व्हा।
- एशिया-प्रशांत हलका मांय श्री आर अर सर्कुलर इकोनॉमी रो 12वों क्षेत्रीय फोरम तीन मार्च ऊं जयपुर मांय व्हेला।
- प्रदेश मांय न्यारा-न्यारा केन्द्रां माथे आज पैला दिन रीट रो इम्तिहान शांति सागे व्ह्यो- तीजी पारी री परीक्षा काल संवारे व्हेला।
- राज्य रा केई हलकां मांय मौसम ओजू बदल्यो- छह जिलां मांय आंधी-बारिश रो येलो अलर्ट।

000

विधानसभा मांय पख अर विपख रा सदस्यां बीचे लारला दिनां ऊं चाल रही रार आज खत्म व्हे गयी। सत्ता पख अर विपख रा आला नेतावां बीचे व्ही चर्चा पाछे कांग्रेस रा विधायक सदन री कार्यवाही मांय शिरकत कीनी। ई बारा मांय आज सदन रा नेता अर मुख्यमंत्री भजनलाल शर्मा विपख रा नेतावां सागे बातचीत कीनी, ज्यीं पाछे रार खत्म करण माथे सहमति बणी। ई पाछे सदन मांय विपख रा 6 सदस्यां रो निलम्बन रद्द करण रो प्रस्ताव पास करी ज्यो। बाद मांय सदन री कार्यवाही मांय शिरकत करता थकां विपख रा नेता टीकाराम जूली मुख्यमंत्री रो आभार जतायो।

000

एशिया-प्रशांत हलका मांय श्री आर अर सर्कुलर इकोनॉमी रो 12वों क्षेत्रीय फोरम जयपुर मांय तीन मार्च ऊं व्हेला। ई बारा मांय आज जयपुर मांय राखी ज्यी प्रेस कॉन्फ्रेंस मांय केन्द्रीय आवासन अर शहरी विकास कार्य राज्यमंत्री तोखन साहू बतायो के तीन दिन रा ई आयोजन रो लक्ष्य कार्बन तटस्थता हासिल करण सारु सर्कुलर सोसायटीज ने आकार देवणो है। श्री साहू बतायो के ओ कार्यक्रम सर्कुलर इकोनॉमी ऊं जुड़ी कोशिशों ने आगे बधावण माथे चर्चा करण अर अंतर्राष्ट्रीय स्तर रा जाणकारां ने एके सागे लावण रो मंच बणेला।

ई मौके स्वायत्त शासन मंत्री झाबर सिंह खर्वा कह्यो के ई आयोजन ऊं प्रदेश रा शहरां ने साफ-बणावण री नुवी प्रेरणा मिलेला। वे कह्यो के वां रो महकमो फोरम री तैयारियां मांय पूरी मदद कर रह्यो है।

ध्यानजोग है के यू.एन.सी.आर.डी. री ओर ऊं साल 2008 मांय सरु करी ज्यो ई फोरम रो मकसद एशिया-प्रशांत हलका मांय सरकारी कारिदां ने तीन आर अर सर्कुलेरेटी ने मुख्य धारा मांय लावण सारु नीतिगत इनपुट देवणो है। फोरम रो आयोजन आवासन अर शहरी कार्य मंत्रालय रा स्वच्छ भारत मिशन-शहरी री ओर ऊं जापान रा पर्यावरण मंत्रालय री मदद ऊं कर्यो जा रह्यो है, जिण मांय राजस्थान सरकार ई मदद कर रही है। सम्मेलन मांय 500 ऊं बत्ती अंतर्राष्ट्रीय अर घरेलू प्रतिभागियां रे शिरकत करण रा आसार है।

000

प्रदेश मांय पंचायतां रा ओजू गठन सारु बणायी ज्यी समिति री पहली मीटिंग आज जयपुर मांय पंचायतीराज मंत्री मदन दिलावर री सदरत मांय व्ही। मीटिंग मांय न्यारा-न्यारा जिला ऊं मिल्या प्रस्तावां री जाणकारी लीरीजी। इण मांय समिति रा सदस्य गृह राज्य मंत्री जवाहर सिंह बेढ़म, खाद्य अर नागरिक आपूर्ति मंत्री सुमित गोदारा, सामाजिक न्याय अर अधिकारिता मंत्री अविनाश गहलोत अर चिकित्सा मंत्री गजेंद्र सिंह खीवसर, समिति रा सचिव अर पंचायती राज विभाग रा शासन सचिव जोगाराम ई शिरकत कीनी।

000

शिक्षा मंत्री मदन दिलावर कह्यो है के देश ने विकसित बणावण रा काम मांय नौजवानां रो खास काम है। वे आज जयपुर रा एक गैर-सरकारी विश्वविद्यालय मांय राखी ज्यो राजस्थान विज्ञान महोत्सव मांय बोल रह्या हा। शिक्षा मंत्री नौजवानां ऊं विज्ञान अर प्रौद्योगिकी रा हलका मांय नुवा प्रयोग करता थकां दुनियाभर मांय होशियारी रो दरसाव करण बाबत कह्यो।

ई मौके भारतीय राष्ट्रीय विज्ञान अकादमी रा अध्यक्ष प्रोफेसर आशुतोष शर्मा, विषय विशेषज्ञ अर मोटी तादाद मांय विद्यार्थी अर शोध करण वाळा मौजूद रह्या। ध्यानजोग है के भारत रा महान वैज्ञानिक सी. वी. रमन री खोज 'रमन प्रभाव' री याद मांय हर साल 28 फरवरी ने राष्ट्रीय विज्ञान दिवस मनायो जावे है।

000

माध्यमिक शिक्षा बोर्ड री ओर ऊं आज राज्य मांय न्यारा-न्यारा केन्द्रां माथे राजस्थान अध्यापक पात्रता परीक्षा-रीट लीरीजी। बोर्ड रा सचिव कैलाश चन्द्र शर्मा बतायो के दो पारियां मांय लीरीजी आ परीक्षा देवण सारू 14 लाख ऊं बत्ता विद्यार्थी नाम मंडाया हा। वे बतायो के दो दिन री ई परीक्षा रा पहला दिन आज शांति रही।

000

अमृत भारत स्टेशन योजना रा तैत डीग मांय रेलवे टेशन ने और बेहतर बणावण रो काम कर्यो जा रह्यो है। संभागीय प्रबंधक (संचालन) प्रशस्ति श्रीवास्तव बतायो के ई योजना रा तैत आगरा मंडल रा डीग समेत 15 टेशनां ने और बेहतर बणाया जा रह्या है। डीग टेशन माथे 14 करोड़ 30 लाख रुपया रा खर्च ऊं प्लेटफॉर्म अर शेड बणावण, एनाउंसमेंट सिस्टम अर रिजर्वेशन काउन्टर बणावण सरीखा काम कराया जा रह्या है।

000

जैसलमेर मांय आज चार दिन रो आरोग्य मेळो सुरू व्ह्यो। जिला प्रशासन अर आयुर्वेद विभाग री ओर ऊं लगाया जा रह्या संभाग स्तर रा ई मेळा मांय आयुर्वेद अर योग सागे प्राकृतिक, यूनानी अर होम्योपैथी तरीका ऊं मरीजां रो मुफ्त इलाज कर्यो जा रह्यो है। आयुर्वेद विभाग रा अतिरिक्त निदेशक डॉ. राजीव लोचन बतायो के मेळा मांय आयुष री न्यारी-न्यारी विधावां अर थैरेपियां रे जरिये इलाज कर्यो जा रह्यो है।

000

सीकर जिला रो नामी खाटूश्याम जी मेळो काल सुरू व्हेला। ई मेळा सारू जिला प्रशासन अर मंदिर समिति री ओर ऊं जरूरी इंतजामात् करी ज्या है। एस.पी. भुवन भूषण यादव बतायो के मेळा मांय आवण वाळभ जातरुआं अर वाहन चालकां रा सुबीता सारू खास व्यवस्थावां करी ज्यी है।

000

राज्य मांय केई ठोडां मौसम ओजू बदल्यो है अर जयपुर समेत ऊगणी हलका रा जिलां मांय केई ठोडां बादळा मंड्या रह्या। भरतपुर मांय दोपहरां पाछे छांटो-छिड़को व्ह्यो। पाली अर जालौर मांय मौसम सुहावणो रह्यो। सरहदी जिलां जैसलमेर अर बाड़मेर मांय आखा दिन बादळा मंड्या रह्या। मौसम केंद्र जयपुर रे मुजब बीकानेर, श्रीगंगानगर, हनुमानगढ़, चूरू, झुंझुनूं अर सीकर जिलां मांय आवता दो दिन आंधी चालण अर बिरखा व्हेवण रा आसार हैं। ई रे अलावा न्यारा-न्यारा जिलां मांय पारा मांय उतार-चढ़ाव री संभावना है। महकमा रे मुजब राज्य रा आतूणी हलकां मांय गर्मी रो असर और बधबा री संभावना है।

000

कोटपुतली-बहरोड़ जिला मांय आधार कार्ड बणावण अर वां मांय बदलाव करण रो सुबीतो मुहैया करावण सारू आज डाक विभाग री ओर ऊं खास शिविर लगायी ज्यो। शिविर मांय सुकन्या समृद्धि योजना समेत डाक महकमा री न्यारी-न्यारी बचत योजनावां री जाणकारी ई दीरीजी। जिला रा शाहपुरा अर कोटपूतली पोस्ट ऑफिस मांय ई दो-दो खास आधार काउंटर लगायी ज्यो। ई रे अलावा ब्लॉक लेवल माथे ई शिविर लगायी ज्यो।

000

डूंगरपुर रा जिला कलेक्टर अंकित कुमार सिंह कृषि पर्यवेक्षकां अर कृषि अधिकारियां ने ई-गिरदावरी रा काम मांय तेजी लावण रा हुकम दीना है। वे आज कृषि विभाग रा अहलकारां सागे मीटिंग कर र विभागीय योजनावां रो जायजो लीनो। जिला कलेक्टर सहायक कृषि अधिकारियां ने सरकारी योजनावां री जाणकारी किसानां ताई पूगावण बाबत् कह्यो।

000